


50

COMITATVS
BELLIOLESII,

vulgo

BEAUIOLOIS.



AD Ducatus Borbonii territorium inferius pertinent inter alia Comitatus duo, qui vulgo *Beaujolois*, & *Forest*. Prior, Bello-jolesius complectitur, quicquid est inter Ligerim & Ararim, situs orientem versus inter Forenses & Burgundos, antiquum Borboniorum patrimonium. Vrbs ejus primaria vernacule dicitur *Beaujeu*. Alter Comitatus nomen habet, non, ut quidem vocabulum præ se ferre videtur, à silvis saltibusque, sed à *Fori* nomine. *Forenses* populi versus septentrionem Borbonio tractui adjacent: ad occidentem Arvernæ: ad meridiem Lugdunensium finibus: ad orientem Bello-jolesiis. Amplissimus est comitatus, qui quæ circiter quadraginta oppida muris cincta, & triginta septem municipia complectitur. Præfuerunt quondam Comites, ex quorum stirpe prognati Bello-jolesii proceres. Celebratur Gal-

lorum historiis Comes quidam Lugdunensis, Forestii & Bello-jolesii, cui tres fuerunt filii; Arthauldus Comes Lugdunensis, Stephanus Forestii, Emfridus Bello-jolesii. Cumq; ita distracti essent longo tempore comitatus Forestii, & Bello-jolesii, coaluerunt rursus morte Guicardi, Comitis Bello-jolesii, qui, regnante Philippo II, Francorum rege, cum honore stabuli Comitem egerat. Ipsius enim soror Isabella, Bello-jolesii Comes, matrimonio locata est Reginaldo, Forestii Comiti, qui natus erat ex stirpe Arthauldi, uti ipsa Isabella ex Stephani prosapia, qui Arthauldi erat frater: eo autem conjugio geniti Guido, cui hæreditate obvenit comitatus Forestii: & Ludovicus, cui Dominium obtigit Bello-jolesii. Post horum tempora nihil ex Annalibus certi haberi potest. Rex Galliarum Henricus III, antequam regnum capesseret, una cum Ducatu Andegavensi apanagii jure possedit Ducatus Borbonii & Arvernæ, Comitatumque Forestii.